



REPUBLIKA E SHQIPËRISË  
KOMISIONI QENDROR I ZGJEDHJEVE

Komisioneri Shtetëror i Zgjedhjeve

Data: 21.7.2023

Nr: 709

Ora: 12:00

VENDIM

PËR

**SHQYRTIMIN E REZULTATIT TË VERIFIKIMIT TË PROKURORIT TË PËRGJITHSHËM PËR  
SUBJEKTIN VETËDEKLARUES Z. ILIR VILSON HYSI, KANDIDAT PËR DEPUTET I PROPOZUAR  
NGA PARTIA LËVIZJA SOCIALISTE PËR INTEGRIM, QARKU VLORË**

Sot më datë 21.07.2023, unë Komisioneri Shtetëror i Zgjedhjeve, në seancë publike shqyrtova çështjen me:

**Objekt:** Shqyrtimi i rezultatit të verifikimit të Prokurorit të Përgjithshëm për subjektin vetëdeklarues Z. Ilir Vilson Hysi, kandidat i propozuar për deputet nga Partia Lëvizja Socialiste për Integrim, Qarku Vlorë, në zbatim të ligjit nr. 138/2015 “Për garantimin e integritetit të personave që zgjidhen, emërohen ose ushtrojnë funksione publike”.

**Palë të interesuara:** Z. Ilir Vilson Hysi, kandidat i propozuar për deputet nga Partia Lëvizja Socialiste për Integrim, Qarku Vlorë, për zgjedhjet për Kuvendin e Shqipërisë të datës 25 Prill 2021.

**Baza ligjore:** Neni 19, pikat 1, shkronja “n” e 2 të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar, nenet 90 dhe 95 të ligjit nr. 44/2015, “Kodi i Procedurave Administrative”, ligji nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”, pikat 12 dhe 13 të Kreut V, të vendimit nr. 17/2016, të Kuvendit, “Për përcaktimin e rregullave të detajuara mbi zbatimin e ndalimeve të parashikuara në ligjin nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”,

Në përfundim të shqyrtimit administrativ,

## VËREJ:

### I.

Në zbatim të ligjit nr. 138/2015, "Për garantimin e integritetit të personave që zgjidhen, emërohen ose ushtrojnë funksione publike" Komisioni Qendror i Zgjedhjeve është organi kompetent për administrimin, verifikimin, zbatimin e ndalimeve për zgjedhjen dhe emërimin për funksionet publike si dhe përpunimin për formularin e vetëdeklarimit për disa subjekte ndër të cilat është edhe "Kandidati për deputet".

Në zbatim të këtyre dispozitave, Z. Ilir Vilson Hysi, kandidat i propozuar për deputet nga Partia Lëvizja Socialiste për Integrim, Qarku Vlorë, ka depozituar pranë Komisionit Qendror të Zgjedhjeve, formularin e vetëdeklarimit me nr. 717 unik.

Përpara miratimit të listave të kandidatëve për deputetë për subjektin zgjedhor Partia Lëvizja Socialiste për Integrim, Qarku Vlorë, në bazë të kompetencave të veta, KQZ bëri verifikimin "prima facie" dhe pasi konstatoi se kandidati nuk është në kushtet e ndalimit, ndërmori hapat e mëposhtme:

- a. Komisioni Qendror i Zgjedhjeve, me shkresën nr. 1823 prot., datë 9.03 2021, ka kërkuar informacion nga Zyra e Gjendjes Gjyqësore, pranë Drejtorisë së Përgjithshme të Burgjeve, e cila nga ana e saj me shkresën nr. 2526/1, prot., datë 11.03.2021, informon Komisionin Qendror të Zgjedhjeve, se kandidati për Deputet z. Ilir Vilson Hysi, rezulton se nuk është i dënuar me vendim penal të formës së prerë.
- b. Komisioni Qendror i Zgjedhjeve, me shkresën nr. 1825 prot., datë 9.3.2021, ka kërkuar informacion nga Zyra e Gjendjes Civile, pranë Drejtorisë së Përgjithshme të Gjendjes Civile, e cila nga ana e saj me shkresën nr. 1030/1 prot., datë 08.04.2021 informon Komisionin Qendror të Zgjedhjeve, se kandidati për Deputet z. Ilir Vilson Hysi, rezulton se ka ndryshuar rubrikën e emrit nga "Ilirjan" në "Ilir".

Pas verifikimeve të mësipërme Komisioneri Shtetëror i Zgjedhjeve me vendimin nr. 147 datë 16.03.2021, vendosi: "Miratimin e listave shumëmemërore të Partisë Lëvizja Socialiste për Integrim, Qarku Vlorë, për zgjedhjet për Kuvend të datës 25 Prill 2021".

### II.

Komisioni Qendror i Zgjedhjeve, në zbatim të ligjit nr.138/2015 "Për garantimin e integritetit të personave që zgjidhen, emërohen ose ushtrojnë funksione publike", verifikoi të dhënat në formularin e vetëdeklarimit të kandidatit për deputet Z. Ilir Vilson Hysi.

Nga verifikimi i të dhënave në formularin e vetëdeklarimit të z. Ilir Vilson Hysi, rezulton se ka deklaruar:

Në rubrikën I. “TË DHËNA PERSONALE”, PIKA B, “Gjeneralitete të mëparshme” të formularit të vetëdeklarimit, subjekti vetëdeklarues ka deklaruar gjeneralitetet e tij dhe është shprehur se, ka ndryshuar emrin nga “Ilirjan” në “Ilir”.

Në rubrikën III. “TË DHËNA MBI GJENDJEN GJYQËSORE TË PERSONIT”, të Formularit të Vetëdeklarimit,

Pyetjes 3, “A keni qënë ndonjëherë në hetim ose në gjykim nga një autoritet i huaj, për kryerjen e një vepre penale?”, subjekti vetëdeklarues është përgjigjur “Po” duke deklaruar se:

Ka qënë në hetim/gjykim nga Policia në Novara, Itali, për arsyë të trafikimit të lëndëve të paligjshme, për periudhën 01.08.2002- 08.01.2003, rezultat i së cilës është shpallur i pafajshëm.

Pyetjes 5, “A është marrë ndonjëherë për ju masa e dëbimit nga një shtet i huaj?, subjekti vetëdeklarues është përgjigjur “Po” duke deklaruar se:

Nga data 01.08.2002 deri në 08.01.2003, është dënuar nga Gjykata Tribunale Di Novara, Itali për veprën penale të parashikuar nga neni 438-458 CPP, për të cilën është deklaruar i pafajshëm.

Pyetjes 8, “A keni jetuar ndonjëherë jashtë territorit të Republikës së Shqipërisë për më shumë se 1 muaj?”, subjekti vetëdeklarues është përgjigjur “Po” duke deklaruar se:

-Në Korrik 2002 deri në Janar 2003 ka qëndruar në Novara, Itali, për arsye procedurë ligjore për marrje pafajësie.

-Në vitet 1991-1995 ka qëndruar në Tripoli, Greqi, për emigracion.

Nga konstatimet e mësipërme dhe bazuar në nenin 8, pika 1, të ligjit nr. 138/2015 “Për garantimin e integritetit të personave që zgjidhen, emërohen ose ushtrojnë funksione publike”, Kreu V, pika 2, shkronja “c”, të Vendimit të Kuvendit, nr. 17/2016 “Për përcaktimin e rregullave të detajuara mbi zbatimin e ndalimeve të parashikuara në ligjin nr. 138/2015, Komisioni Qendror i Zgjedhjeve me shkresën nr. 2545 prot., datë 23.03.2021, vendosi t’ia kalojë rastin për verifikim të thelluar Prokurorisë së Përgjithshme, si institucioni kompetent që kryen verifikimin e plotë të deklarimeve të bëra.

Me shkresën nr. 531/60 prot., datë 03.07.2023, Drejtoria e Koordinimit Institucional, Sektori i Dekriminalizimit pranë Prokurorisë së Përgjithshme, ka dërguar në Komisionin Qendror të Zgjedhjeve, vendimin “Për miratimin e rezultatit të verifikimit për subjektin Z. Ilir Vilson Hysi, Prokuroria e Përgjithshme pas kryerjes së gjithë verifikimeve përkatëse, i konsideron këto të fundit të plota dhe të bazuara në nenin 8, pikat 1 dhe 2, të lidhura me nenin 5 të ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike” si dhe në përcaktimet e pikës 3 shkronja “ç”, Kreu III dhe pikave 10, 11, 12

e 13 të Vendimit të Kuvendit nr. 17/2016, ka miratuar rezultatin e verifikimit të subjektit vetëdeklarues z. Ilir Vilson Hysi, sipas të cilit konstatohet si më poshtë:

- Rezulton se me procesverbalin nr. 280, datë 01.12.2004, ka ndryshuar përbërësin e gjendjes civile, rubrikën e emrit nga “Ilirjan” në “Ilir”, ndryshim i cili është pasqyruar në regjistrin themeltar të regjistrit të popullsisë të vitit 1974 “Sarandë”, me referencë 56/16;
- Nuk rezulton i dënuar me vendim gjyqësor të formës së prerë nga një autoritet gjyqësor shqiptar ose i huaj;
- Nuk rezulton i dënuar me vendim gjyqësor jopërfundimtar nga një autoritet gjyqësor shqiptar, për një çështje penale të pazgjidhur me vendim gjyqësor të formës së prerë;
- Rezulton që ka qënë në hetim në Novara, Itali, për veprën penale “Trafikim i lëndëve narkotike” me rezultat pafajësi;
- Rezulton të ketë qënë i arrestuar më datë 05.08.2002, në qytetin Novara, Itali për veprën penale të “Trafikim i lëndëve narkotike”;
- Nuk rezulton që ndaj tij të jetë caktuar masë shtrënguese e sigurisë personale;
- Nuk rezulton të ketë urdhër kërkimi ndërkombëtar lidhur me kryerjen e ndonjë vepre penale prej tij;
- Nuk rezulton të jetë dëbuar nga territori i ndonjë shteti të huaj

### III.

Komisioneri Shtetëror i Zgjedhjeve, në përfundim të shqyrtimit të dokumentacionit dhe rezultatit të verifikimit të thelluar, të Prokurorit të Përgjithshëm konstaton se:

Ligji nr. 138/2015 dhe vendimi nr. 17/2016 i Kuvendit, përcaktojnë në mënyrë të qartë dhe të detajuar se subjektet kanë detyrimin ligjor të deklarojnë çdo informacion në lidhje me gjeneralitetet e tyre aktuale e të mëparshme, rekordet kriminale brenda dhe jashtë territorit të Republikës së Shqipërisë (vendime dënimi përfundimtare ose jo, hetime penale jashtë territorit të Republikës së Shqipërisë, masa sigurimi personale, vendime dëbimi, ndalim arrestime, hetime, etj).

Z. Ilir Vilson Hysi, kandidat i listës shumemërore të Partisë Lëvizja Socialiste për Integrim, në zgjedhjet për Kuvendin e Shqipërisë të datës 25 Prill 2021, Qarku Vlorë, nuk ka marrë mandat deputeti. Subjekti zgjedhor Partia Lëvizja Socialiste për Integrim, referuar neneve 162 dhe 163 të Kodit Zgjedhor nuk ka fituar asnjë mandat në Qarkun Vlorë. Në kushtet kur subjekti vetëdeklarues, kandidat i listës shumemërore të Partisë Lëvizja Socialiste për Integrim, nuk do të mund të përfitojë mandat në Qarkun e Vlorës për këtë legjislaturë, Komisioneri nuk mund të shprehet me vendimmarrje për çështjen objekt shqyrtimi, për sa kohë ky subjekt nuk gëzon statusin e deputetit dhe në asnjë rast e për asnjë rrethanë nuk do të mund të marrë këtë funksion publik për të cilin është iniciuar procedura administrative e verifikimit të thelluar. Komisioneri mund të shprehet vetëm kur përmbushen kushtet ligjore të moskandidimit, moszgjedhshmërisë apo mbarimit të mandatit për rastet e parashikuara në ligjin nr. 138/2015.

Në rastin objekt shqyrtimi, në analizë dhe zbatim të neneve 10 dhe 11 të ligjit nr. 138/2015, si dhe neneve 90 dhe 95 të ligjit nr. 44/2015, “Kodi i Procedurave Administrative” vlerësohet se ka humbur objekti dhe qëllimi i procedurës administrative të filluar përpara ditës së zgjedhjeve.

#### **PËR KËTO ARSYE:**

Bazuar në nenin 19, pikat 1, shkronja “n” e 2 të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar, nenet 90 dhe 95 të ligjit nr. 44/2015 “Kodi i Procedurave Administrative”, ligjin nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”, pikat 12 dhe 13 të Kreut V, të vendimit nr. 17/2016, të Kuvendit, “Për përcaktimin e rregullave të detajuara mbi zbatimin e ndalimeve të parashikuara në ligjin nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”

#### **V E N D O S:**

1. Deklarimin e procedurës administrative të përfunduar dhe pa vendim përfundimtar për subjektin vetëdeklarues z. Ilir Vilson Hysi.
2. Ky vendim hyn në fuqi menjëherë dhe publikohet në faqen elektronike zyrtare të Komisionit Qendror të Zgjedhjeve.
3. Kundër këtij vendimi mund të bëhet ankim në Komisionin e Ankimimeve dhe Sanksioneve, brenda 3 (tre) ditëve nga shpallja e tij.

**Komisioneri Shtetëror i Zgjedhjeve**

**Ilirjan CELIBASHI**